


POPULESEN MO RESOSES VANUATU



**SAM ENVAERONMEN INFOMESEN BLONG OL TIJAS, WOMAN, YUT,
KOMUNITI MO JIOJ LIDAS.
BLONG GIVAN LONG ENVAEROMEN EDUKESAN**



Vanuatu Environment Unit long
Ministry of Agriculture, Livestock, Forestry, Fisheries and Livestock
emi preparem mo produsum long SPREP/AusAID
Risos Developmen woksop long Oktoba 1996



TOKTOK BLONG THANK YU

Mi ekspresem bigfala thank yu long ol staff blong Environment Unit speseli Russell Nari mo Environmental Education (EE) Awareness Project Officer, Donna Kalfatak long help blong samfala tingting mo komens we tufala i kontributim blong prodiusim buklet ia.

Tu bigfala thank yu iko long AusAID mo SPREP (South Pacific Regional Environment Programme) blong fandem buklet ia. Mo mi biliv se bae SPREP i kontiniu blong sapotem Ofis ia blong prodiusim moa risos materiols abaot envaeromen long fiuja.

KONTENT

INTRODAKSEN	1
ROD BLONG KAKAE BLONG SAMFALA ANIMOL BLONG SOLWOTA	2
WOTA KATSMEN (WATER CATCHMENT)	4
ROD BLONG KAKAE BLONG SAMFALA ANIMOL LONG SOLWOTA	6
ROD BLONG KAKAE BLONG SAMFALA ANIMOL LONG BUS	8
I TABU BLONG KILIM OL KAOFIS	10
POPULESEN WETEM RISOS	12
SAPOS YUMI NO LUKAOT GUD LONG BUS BLONG YUMI PLANTE PROBLEMS OLI SAVE KAM ANTAP	14
DIFREN LEIA BLONG SOEL	16
DEVELOPMEN BLONG OL NAJUROL RISOSES – JOIS BLONG YU	18
WOTA SAEKOL (WATER CYCLE)	20
ROD BLONG OKJIJEN (OXYGEN) MO KABON DAIOKSAED (CARBON DIOXIDE)	22
PROTEKTEM OL FLAING FOKS BLONG YUMI	24
NAMALAU I STAP LONG DENJA	26
KOKONAT KRAB	28
NAMBA BLONG NAWIMBA LONG VANUATU I STAP KO DAON	30
TOKTOK BLONG THANK YU	32

INTRODAKSEN

Vanuatu hemi wan long olgeta kaontris long South Pacific we hemi gat gudfala envaeromen. Hemi rij long bus wetem ol wael laev mo tu ol animols we oli stap long solwota.

Be yumi luk se populesen blong Vanuatu hemi stap kro kwik taem mo plante divelopmen i stap tek ples. Risal blong hem yumi luk se plante bus blong yumi i distroe, namba blong ol animols long land mo solwota i stap ko daon bigwan. Yumi fraet se sapos yumi no mekem sam kontrol o gud manejmen long ol risoses blong yumi bambae yumi lusum plante long olgeta. So, wanem nao bae yumi mekem blong daonem ol problem ia?

Smol buklet ia emi gat fotin (14) difren envaeromen isius o problems we emi haelaetem. Fes tinting i kamoat konsenem buklet ia emi blong prodiusim wanwan olsem frip jats (Flip charts). Tingting ia i jenis from we hemi isi blong prodiusim olsem wan buklet blong mekem i isi tu blong distribiutim iko long ol difren okanaesesens.


Buklet is hemi tokbaot plante envaeromenal isius mo problems we yumi stap fesem tedei long ol aelans blong yumi long Vanuatu. Emi no tokbaot long diteil be emi aim blong haelaetem ol isius o problems ia blong jeneraetem diskasens long olgeta speseli long klasrum, woksops, mitings, etc... Mo blong traem faenem sam weis blong ridiusim olgeta problems ia.

Buklet ia, ol difren okanaesesens oli save usum, olsem ol jiojes, skuls, womens grup, jifs, rurol trening sentas, non-kavman okanaesesens (NGOs) mo emi interested individual persen wetem ol narafala okanaesesens long nasonal mo vilej levels.

Mi biliv bae yufala i faenem buklet ia emi iusful long ol prokrams blong yufala. Speseli long diskasens long ol isius o problems we buk i haelaetem. Me biliv tu se buk ia bae emi enkarejem yufala blong pasem envaeromenal infomesen o save iko long ol pipol blong yumi. Mo blong enkarejem yumi plante blong lukaotem gud ol plants mo animols wetem envaeromen blong yumi.

Mi wisim yufala gudfala diskasen, mo helti envaeromen long wanwan ples blong yufala!

ROD BLONG KAKAE BLONG SAMFALA ANIMOL BLONG SOLWOTA



Man wetem trifala animol ia long solwota oli liv mo dipen long wan anata. Oli helpem wan anata blong kakae mo mekem pikinini blong olgeta.

Pija antap emi soem se man emi kakae bubu sel, bubu sel ikakae stafis, mo stafis ikakae rif.

Sapos yumi havestem tumas long populesen blong wan animol bambae emi afektem namba blong ol narafala animol.

Emia emi exampol blong ol animol long solwota. Situesen olsem emi aplae long ol animols mo plans long solwota mo land tu.

Yumi mas save gud se evri samting long wol oli mas liv long wan balens envaeromen blong oli stap helti oltaem. Emi semak olsem yumi man inidim balens kakae blong yumi stap helti oltaem.

Emi duti blong yumi blong lukaotem gud ol evri living samting insaed long envaeromen blong olgeta.

OL AKTIVITIS


1. Wanem nao emi impotan abaot bubu sel long ples o aelan blong yu?
2. Wanem nao saes limit blong bubu sel bifo yu save pikimap? Sapos yu no save, yu save faenemaot long Fiasaris Depatmen o Environment Unit.
3. Sapos yu havestem tumas bubu sel, wanem bae ihapen long stafis wetem korel?
4. Enkarejem ol man blong no salem ol andasaes bubu sel? Yu save tokbaot long big o smosmol grup olsem wanem blong protektem bubusel.

WOTA KATSMEN (WATER CATCHMENT)

Pija emi soem eria blong wota katsmen. Emi minim se ol hil wetem ol bus mo ol wota sos oli impoten long storem wota. Tu emi helpem rod blong ren mo mentenem level blong wota istap gud oltaem.

Blong mekem wan developmen long eria blong wota katsmen. Fo exampol, beldem haos o wokem karen o lukaotem buluk. Yumi mas mek sua se yumi karemaot ol developmen olsem wetem sam gud manejmen. Exampol no mekem fanis blong buluk, mekem karen mo beldem haos kolosap tumas long wota sos. Lukaotem gud bus araon long wota sos mo ol hil.

Fasin olsem emi save help blong lukaotem gud wota katsmen eria iko long fiuja.




OL AKTIVITIS

1. Sapos yu ting se igat wan wota katsmen eria long ples blong yu, visitim mo notem daon wanem fijas oli impotan long em?
2. Diskasem sapos igat eni divelopmen long katsmen eria ia. Fo exampol, karen istap kolosap tumas long wota sos o fanis blong buluk o pig, o maet loging.
3. Sapos we igat divelopmen olsem, yu ting se emi gat wan impak long wota katsmen ia?
4. Sapos igat impak, wanem steps nao yu ting se yu save mekem blong enkarejem pipol blong lukaotem gud wota katsmen eria?

ROD BLONG KAKAE BLONG SAMFALA ANIMOL LONG SOLWOTA

Pija ia isoem rod blong kakae blong samfala plans mo animols insaed long solwota.



Kras blong solwota mo natongtong oli usum eneji blong san blong kro mo mekem kakae blong olgeta. Wanwan animol ikakae stret long liv blong olgeta plans ia. Ol lif we oli stap roten andanit long gras o natongtong oli provaedem gudfala kakae tu blong ol animol olsem si-kukamba mo samfala selfis. Plante fis, natalai mo ol nara selfis oli kakae ol smosmol fis.

Pija antap isoem se olgeta plans mo animols oli sapotem laef blong wan another. Sapos populesen blong wan animol o plan ikam smol o finis, bambae iafektem laef blong ol narafala fren blong olgeta long sem envaeromen.


OL AKTIVITIS

1. Wanem nao wok blong san? Sapos ino gat san bae wanem ihapen long ol narafala laef?
2. Sapos inogat natongtong bae wanem ihapen long si-kukamba mo narafala selfis?
3. Mekem wan visit iko long rif kolosap long natongtong eria mo notem daon ol animol mo plans we oli liv long ples ia. Wanem nao wok blong ol plans mo animols we oli liv long ples ia?
4. Wokem wan play long rol blong ol animols mo plans long ples ia?

**ROD BLONG KAKAE BLONG SAMFALA
ANIMOL LONG BUS**


Pija ia emi soem samfala animol we oli liv, kakae tugeta mo sapotem laef blong wan anata insaed long wan bus envaeromen.

LEVEL 4




KINGFISA

LEVEL 3



LISET

LEVEL 2



KATAPILA
(Smosmol bebet)

LEVEL 1



NABANGA

Nabanga wetem bus raon long em hemi hom blong fulap animol osem Kingfisa, Liset mo katapila. Pija antap isoem se katapila ikakae lif blong nabanga, liset ikakae katapila mo kingfisa ikakae liset. Sapos namba blong wan animol emi ko daon bae emi afektem namba blong ol narafala animol tu.

Emi impotan blong proktekem gud ol bus blong yumi blong help protekem laef blong ol animol we oli liv long bus.

OL AKTIVITIS

1. Wanem bae ihapen long katapila, liset mo kingfisa sapos man emi katem daon nabanga?
2. Wanem bae ihapen long ol frut blong nabanga sapos man emi kilim evri kingfisa? Tu wanem bae ihapen long soel from tris oli mekem soel irij mo holem wota anda long soel? Wanem bae ihapen long animol mo man we oli dipen ol tris ia?

Note long tija o kontakta:

Kingfisa emi help blong spredem sids blong nabanga mo ol narafala tris long ol narafala ples blong gro bakeken. Taem yumi kilim ol kingfisa bae sid oi no save kasem narafala ples blong gro. Emi minim se emi nomo gat tris blong mekem soel irij, tris o bus blong holem gud graon, wota anda long graon, ol narafala animol oli nomo gat hom blong liv mo kakae, mo tu man emi afekted long saed blong wokem karen mo wota emi no naf.

3. Mekem wan plei long long laef blong ol animol ia. Plei emi sud fokus se laef blong ol animols long pija emi dipen long nabanga.

I TABU BLONG KILIM OL KAOFIS

Kaofis emi wan animol blong solwota we emi stap long denja blong kam finis olgeta. Emi protekted anda long intanasonal loa we oli kolem CITES (Convention on International Trade in Endangered Species of Wild Fauna and Flora).



Kaofis emi kam long sem famili grup blong dolpin mo wel. Emi wan animol we oltaem emi mas kam antap long sevis blong wota blong britim ea. Taem emi stap anda long solwota emi no save brit.

Wan stadi we ikamaot long Environment Unit emi soem se abaot 300 kaofis oli stap olbaot long solwota blong Vanuatu.

Evri taem emi stap liv long solwota we emi no dip tumas o insaed long bei.

Kaofis istap kakae sikras nomo. Long Vanuatu yu save lukim olgeta plante long ol erias we igat plante sikras olsem Havannah Haba mo Undine Bei long Efate, Lamén Bei long Epi, Saot Is Malekula mo Hog Harbour long Santo. Kaofis emi ino stap liv long wan eria nomo be emi mas muv from eria blong sikras iko long narafala.

Kaofis emi wan frendli animol mo laef blong hem istap long han blong yumi.


Respektem kaofis taem yu luk long wota blong yumi.

OL AKTIVITIS

1. Long aelan o ples blong yu, igat wan kastom ius blong animol ia?
2. Long wanem aelans o ples long Vanuatu, kaofis ikam wan turis attraksen?
3. Raetem eni kastom stori abaot kaofis.
4. Sapos igat kaofis long eria blong yu, tekem wan visit iko long em. Emi frendli o wael?
5. Wanem steps yu save mekem blong proktekem laef blong kaofis?

POPULESEN WETEM RISOS


Pija ia isoem relesensip taem populesen blong man ikam antap isave afektem ol wei we man isave usum ol resoses blong hem.



OL AKTIVITIS

1. Lukluk long pija blong explenem wanem ihapen long risoses taem populesen iko antap? Wanem ihapen long saes blong graon?
2. Wanem nao lukluk blong yu long saed blong ol risoses ia long ples blong yu bifo, tedei mo long fiuja. I gat eni jenis long ples ia o nogat?
 - a) Bus
 - b) Natongora
 - c) Kava
 - d) Namalau
 - e) Nawimba
 - f) Flaing Foks
 - g) Naura
 - h) Totel
 - i) Grin snel
 - j) Trokas
 - k) Kokonat krabYu save addem ol narafala risoses we yu save tingabaot.
3. Sapos ol risoses ia oli stap finis wanem steps nao yu save tekem blong lukaotem gud o inkrisim namba blong olgeta bakeken?
4. From wanem Famili Planning emi impotan long topik ia?

**SAPOS YUMI NO LUKAOT GUD LONG BUS BLONG YUMI
PLANTE PROBLEMS OLI SAVE KAM ANTAP**



EKSPLENESEN BLONG PIJA

1. Man ibin katem daon plante tri long hil. Wota katsmen eria (Water catchment) ikam nogud. Klaemet ijens. Ren ino foldaon plante olsem bifo.
2. Kraon istap nating mo imekem ren mo wind isave kam isi nomo. Rus blong ol tri oli nomo save holem taed kraon. Ren iwasemaot top soel (top soil). Long English toktok oli kolek "Soil Erosion".
3. Ren ino save ko daon gud tru long soel. Hevi ren iko daon long riva mo imekem wota ifulap gud. Sem taem wota idikim saed blong riva.


4. Level blong wota ikam antap mo plante sof mad wetem ol toti oli ko daon long botom blong riva. Flading itek ples long ol flat eria mo idistroem ol kakae long karen.
5. Riva ibin wasemaot plante toti mo oli ko long solwota. Ol korel rif oli ded from oli no save laef long toti wota. Emi minim se plante animol mo plans we oli liv long ples ia oli ded tu.
6. Sapos yumi tekem long wol skel, fasin blong katemaot tumas bus emi kontribiut tu blong krietem wan nara envaeromen problem we oli kolem "Krin Haos Efekt" (Greenhouse Effect). Distraksen blong tropikel renfores emi kosem plante plans mo animols blong kam finis olgeta (extinction).

OL AKTIVITIS

1. Wanem bae I hapen long envaeronmen sapos yu katemaot plante bus antap long hil long ples blong yu?
2. Wanem bae I hapen long namba blong animols sapos yumi distroem plante bus?
3. Visitim wan simila eria olsem pija I soem? Wanem nao lukluk blong yu long ol aktivitis ia?

DIFREN LEIA BLONG SOEL

I gat tri mein leia blong soel we yumi save faenem sapos yumi dik iko daon long kraon. I gat top soel (top soil), sabsoel (subsoil) mo bedrok (bedrock).



Hiumas (Humus)

Soel we emi rij tumas long ol gudfala kakae (nutrients) blong ol plans oli usum mo gro. Kala blong soel emi veri dak.

Level A (Topsoel)

Leia ia emi rij tu long ol gudfala kakae. Kala blong soel emi dak o braon.

Level B (Sabsoel)

Leia ia emi no rij tumas long gudfala kakae olsem leia A. Kraon wota emi stap long leia ia. Rus blong ol bigfala tri oli save kasem leia ia. Kala blong soel emi braon.

Level C (Bedrok)

Leia emi nogat ol gudfala kakae. Emi fulap long ol bigfala rok nomo.


Emi impotan blong save se ol tri o bus oli playem impotan rol blong mekem soel irij oltaem. Ol ded pats blong tri o bus oli kam roten wetem help blong ol smosmol bebet long kraon oli tanem olgeta ikam rij soel. Man inidim rij soel ia blong groem ol kakae blong hem.

So emi impotan oltaem blong yumi mas tekem gud kea long bus mo soel blong yumi.

OL AKTIVITIS

1. Hamas difren kaen leia blong soel yu save faenem sapos yu dik iko daon long graon?
2. From wanem yumi talem se “hiumas” hemi best pat blong soel?
3. Sapos yu katemaot plante bus o bonem bus blong yu wanem bae I hapen long kwaliti blong soel?
4. Dikim wan smol hol blong adentifaem ol difren leia blong soel. Kala blong soel bae I save talem difren soel leia. Maet yu save luk hiumas, mo leia A nomo.

DEVELOPMEN BLONG OL NAJUROL RISOSES – JOIS BLONG YU




OL AKTIVITIS

1. Pija antap emi tokbaot trifala jois blong tekem taem yu wantem usum ol risoses long graon blong yu. Olsem wanem long yu, wanem jois nao yu wantem?
2. Toktok long pipol kolosap long yu. Faenemaot tingting blong olgeta long trifala jois ia.
3. Droemap wan simpol plan blong vilej blong yu. Traem planem olsem wanem blong usum ol difren risoses tedei mo long fiuja.

WOTA SAEKOL (WATER CYCLE)

Pija ia emi soem rod blong ren taem emi fom antap long skae mo foldaon, mo afta wota patikols oli raes iko antap long skae bakeken. Ol wota sos olsem spring wota, krik, riva, leik, solwota mo bus oli veri impotan long sistem ia. Emia from oli sapotem rod blong ren blong istap gud oltaem.



Wota saekol emi minim tu se wota istap muvmuv olbaot oltaem o istap ko araon long wan sekel. Emi mekem se ren isave kontiniu blong fom mo foldaon long kraon oltaem.

Yumi sud save se evri wanwan samting we istap long pija oli playem impotan rol insaed long wota saekol. Sapos wan pat blong saekol o rod blong ren ikam nogud, for exampol, yumi katemaot tumas bus long wan ples, bambae iafektem amaon blong ren we isave foldaon long eria ia.

So yumi mas tekem gud kea long ol wota sos mo bus blong eria blong yumi blong mekem yumi save risivim ren oltaem mo yumi gat inaf wota.

OL AKTIVITIS

1. Sapos yu katem daon fulap tris, bae rod blong ren iafekted o no? Sapos emi afekted, explenem olsem wanem?
2. Tekem wan empti plastik bag we yu save luk tru long em mo fulmap wan brans (no katemaot brans) blong tri o flaoa long em mo fasem taet. Inspektem plastik bag long fiu haoas o dei afta. Raetem daon wanem yu faemaot. Wanem yu faenemaot emi tokbaot eni samting long pija antap?


Note iko long tija o kontakta:

Aktiviti ia emi soem long ol pikinini o patisipans rod blong wota ikamaot long ol lif blong plans (respiration).

3. Wota we ipas andanit long graon emi ko endap long wea?
4. Taem klaod emi ko fas long hil, wanem ihapen?

ROD BLONG OKJIJEN (OXYGEN) MO KABON DAIOKSAED (CARBON DIOXIDE)

Pija ia emi soem fasin we ol man mo animol oli usum okjijen mo givimaot kabon daioksaed, mo ol plans oli usum kabon daioksaed mo givimaot okjijen.



Ol plans oli tekemaot kabon daioksaed long ea mo usum blong gro mo mekem kakae

Ol bigfala faktri o indastri, faea wetem ol man mo animol oli givimaot kabon daioksaed iko long ea

Mo sem taem oli kivimaot okjijen iko long ea blong ol man wetem animol blong usum

Mo sem taem ol man wetem animol oli tekem in okjijen mo usum


Yumi mas lukaotem gud ol bus o tri raon long yumi from oli men saplaea blong okjijen mo tu oli bes klina blong ol toti ea (Karbon Daioksaed) raon long yumi.

OL AKTIVITIS

1. Faktri mo faea oli produsum wanem kaen gas?
2. From wanem ol bus o tris oli impotan long pija ia?
3. Wanem gas emi fres ea we yumi britim evri taem? Wanem gas tris o bus oli usum blong gro mo mekem kakae blong olgeta?
4. Wanem bae ihapen sapos yumi katem daon evri bus o tris long wol?

PROTEKTEM OL FLAING FOKS BLONG YUMI

I gat fo difren kaen flaing foks long Vanuatu. Blak Flaing foks emi moa bigwan bitim ol nara wan. Emi stap long Vanuatu mo narafala aelans long Pasifik.



Blak Flaing foks emi namba wan mit long Vanuatu. From risen ia ol man oli kilim tumas blong kakae mo salem long hotel mo sanem iko ovasis.

Waet Flaing foks emi (endemic) spesel long Vanuatu nomo from emi no stap long nara kaontri.

I gat wan kaen Flaing foks bakeken we emi stap long Banks mo Torres aelans nomo.

Narafala emi Longtel Frut Bat we emi liv plante long kev kolosap long solwota.

Lukluk long tedei isoem se populesen blong Flaing foks iko daon bigwan long evri aelans long Vanuatu. Flaing foks emi protekted anda long Intanasonal Loa we oli kolem CITES (Convention on International Trade in Endangered Species of Fauna and Flora).


Yumi mas repektem taem blong mekem pikinini blong em, no kilim ol smosmol saes o tekem inaf nomo blong kakae. Tu yumi mas putum tabu long olgeta long sam manis blong mekem populesen ikam antap bakeken.

OL AKTIVITIS

1. Hamas difren kaen flaing foks istap long Vanuatu? Givim nem blong olgeta.
2. Wij wan long olgeta emi spesel (endemic) long Vanuatu?
3. Yu luk se igat fulap flaing foks long aelan o ples blong yu? Sapos yes o no, from wanem?
4. Wanem steps yu save mekem blong protektem ol flaing foks long Vanuatu?
5. Raetem wan kastom stori long aelan blong yu abaot flaing foks o aktem wan pleplei long em?

NAMALAU I STAP LONG DENJA

Namalau (Incubator Bird) emi wan spesol pijin we emi stap dikim hol long graon mo berem ol ek blong hem. Ol ek blong hem oli stap wom oltaem wetem help blong najural hit long graon. Tru long weia nao ol pikinini namalau isave develop.



Fasin we fulap man o woman Vanuatu istap usum blong dikim ol ek blong namalau mo kilim mama namalau istap putum ol pijin ia long denja. Tedei, namba blong ol namalau long ol aelans blong yumi istap ko daon bigwan.

Fulap long yumi istap dipen long ol ek blong namalau blong kakae mo salem blong winim vatu. Be hemi impoten tumas blong yumi lukaot gud long olgeta mo ples we oli stap usum blong putum ek blong olgeta.

Blong mekem se namba blong namalau istap gud oltaem, yumi mas respektem mo no kilim mama namalau mo taem we oli putum ek. Respektem ol difren taem we ek istap divelop ikam pikinini namalau. Emia stat long manis Julae kasem Maj long evri yia. Briding sisen ia emi aplae long ol narafala pijin. Sapos yu ko blong dikim ek, tekem inaf nomo blong kakae.

I gat ol difren wei blong mekem sua se ol namalau blong yumi oli stap gud oltaem. Fasin blong putum tabu long namalau wetem ples blong putum ek blong sam manis isave help bigwan blong namba blong olgeta isave kam plante bakeken.


OL AKTIVITIS

1. Wanem manis ol namalau oli leyem ek?
2. From wanem namalau imas berem ek long groan?
3. I gat plante namalau tedei long ples blong yu? Sapos yes o no, from wanem?
4. Sapos namalau istap finis long aelan o ples blong yu, wanem steps nao yu save tekem blong mekem namba ikam plante bakeken?

KOKONAT KRAB

Kokonat krab emi olsem bimest krab long wol. Emi wan komon animol long ol kaontris long Pasifik. Tete kokonat krab iplante long Vanuatu mo Solomon Islands. Be long tufala kaontris ia lukluk istap se namba blong olgeta istap kontiniu blong ko daon.

Laef blong kokonat krab emi difren smol long ol narafala animol. Yumi save se taem emi kam bigwan emi stap liv long land. Be stadi isoem se emi spendem fes manis long laef blong em taem emi smol olsem 4mm, long solwota. Afta emi stap olsem wan nakato long wan yia, we emi ko insaed long wan empti sel tu long sanbis.



Taem emi kam bigwan, kokonat krab emi muv iko inland mo stap.

Long Vanuatu, plante kokonat krab istap long Santo/Malo mo Banks/Torres rijin.

Plante man Vanuatu oli laekem kakae kokonat krab from gudfala mit blong hem. Sam taem oli salem olgeta long hotel blong winim vatu blong olgeta.

From fasin ia blong kakae mo salem kokonat krab, namba blong olgeta ikam smol long plante aelans.


Blong protektem laef blong kokonat krab, yumi mas respektem taem mama kokonat krab oli karem ek. Long Santo/Malo emi Oktoba namba 31 kasem Epril namba 1 evri yia. Mo Banks/Torres emi Okis namba 31 kasem Novemba namba 1 evri yia. Yumi sud harvestem stret saes blong em we emi 9 sentimita, mo yumi mas pututm tabu long olgeta blong sam manis. Fasin olsem isave help bigwan blong inkrisim namba blong krab kokonas bakaken.

OL AKTIVITIS

1. Wanem saes limit blong kokonat krab bifo yu save havestem?
2. Wij tu rijin long Vanuatu, yu save faenem fulap kokonat krab tedei?
3. From wanem namba blong kokonat krab iko daon plante tedei?
4. Hao nao yu save mekem blong namba blong kokonat krab ikam plante bakeken?
5. Boroem video long "On the Reef" from Environment Unit blong lanem wan kastom stori abaot kokonat krab. (Kaset ia Wan Smol Bag Theatre emi produsum).

NAMBA BLONG NAWIMBA LONG VANUATU I STAP KO DAON

Nawimba emi wan spesel pijin blong Vanuatu. Emi endemic pijin, we emi mininim se yu save faenem long Vanuatu nomo, be emi no stap long narafala kaontri.



Plante man Vanuatu oli stap kilim nawimba from gudfala mit blong hem blong kakae. Tu, sam taem oli salem long hotel o sanem iko long ol fren blong olgeta ovasis.

Fasin blong kilim plante nawimba imekem namba blong em iko daon bigwan long aelans blong yumi.

Blong mekem se yumi protektem laef blong spesel pijin ia, yumi mas respektem taem we oli leyem ek mo gat smol pikinini we emi manis Julae kasem maj long evri yia. Yumi no mas destroem ol ek long nes, mo yumi save kilim inaf nomo blong kakae.

Fasin blong putum tabu long nawimba blong sam manis isave help bigwan tu blong inkrisim pipulesen blong em.

Yumi mas protektem laef blong nawimba long Vanuatu o sapos no bambae inomo gat spesel pijin ia long Vanuatu.

OL AKTIVITIS

1. From wanem nawimba emi spesel long Vanuatu?
2. From wanem namba blong nawimba I stap ko daon long plante aelans blong yumi.
3. Man isave kilim nawimba (mo ol nara pijin) long difren weis, olsem hem iusum bo mo aro, trap mo masket. From wanem tradisinal weis blong yumi blong katsem nawimba emi moa gud bitim wei blong waet man?
4. Wanem nao yumi save mekem blong protektem laef blong nawimba mo inkrisim namba blong em bakeken?